

# 3 JOON

## Dahg Wargahng Agweed Joone

### Rob Ke Nying Warga

Dahg warga gihr Joon anaa agweed ke ngaa duohng akuud yaa ayiibe ne oohr yihr ngad akuud yaa yiho me duohng me nyinge Gaayoj. Ngaa agweehdo, Gaayoj aleeye ke nying gihn akonye jo yiho. Nyoge atoohne ubahngge rog gen be lwaay gene yi cing ngaa me nyinge Diotreapej.

### Kaa Acaan Luube

Lum umodho 1-4

Gaayoj aleej 5-8

Diotreapej acay 9-10

Diihmeter wiibe amoar 11-12

Gug luube 13-15

**1** <sup>1</sup>A ge ngaa duohng akuud yaa ayiibo an ne gweehd yihri yih Gaaw goma maa anhyaara ne cohg. <sup>2</sup>Yih goma me nhyaara, ngo gaahna gaahno kejea yih ubeehdo ke yoohm rog, kedea beehn tiihyi caahdhe beer mee wa ka beehdi naa anweehd keehd Juog. <sup>3</sup>Cwihnya amihno keraahyo bang gihn yaa akuud maa abeehn kan ngo arob gene kejea yih ubeehdo ke dhe yoohn giib beeye ge anyoadh Juoge. E ngo ngahya naa athiir kejea yih ubeehdo ke dhe yoohn nu ke cahng ke cahng.

### Gaaw Apuoj

<sup>4</sup>Nea lihnga lihngo kejea nyethena ge beehd kaa dhe yoohn giib beeye ge anyoadh Juoge, e cwihnya udoohng med keter utoor gihn me kaal wiibe. <sup>5</sup>Goma maa anhyaara, giib me thoohdh ge ayugi ne kony yaa ayiib giibo ge puohny Ciig Beer. Keehd me nahg gene nyoge me kwihyi, e ge konyi konyo. Gihn ni e naa anyoadh ngo yihra kejea yih beehda ngaa maa ayiib Jeacuu ne cohg. <sup>6</sup>Yaaj mooge maa akonyi, ge arubo yihr wan kan ke nying kaa anhyaari yaa akuud giibo keter. Awaahn ni, ngo aroba yihri kejea dhiil bar maalo ke kony gen. Thiow kwaad giib daahd gene cubi gen yihr gen ke cwihnyi cang nea ge uaay ne bar kuohn mooge ne puohny. Dhiil giib nu ke tiihyo wa maano bang gihn e naa dhe yoohn daahd Juoge ukony yaae rog gen. <sup>7</sup>Kony gen bang gihn ge nyoge me wen bang wiib piny e ge tiihy ke yihr Jeacuu, kedea ge padh nyoge me yiib kuny gihn yoad bang yaa kuu ayiibo. <sup>8</sup>Noono e wo yaa akuud, yaa ni ge dhiilo kaa loro. Loro gen kedea muojo gen ke kwaad giib daahd gene beere wo udoohng naa acielo keehd gen yi tiihy rob adiehj beeye ge anyoadh Juoge.

### Modhu Ubahngge Tihiy Detreapej Be Ngooru

<sup>9</sup>A anaa agweehd ke warga yihr akuud geenu. Abea Detreapej, ngaa daahd unahge en naa ruohdh yaa akuud akweer ke luma. <sup>10</sup>Gihn nu, nea cahng ubeehna bangu, e giib tihiy Detreapej ge uroba oogo nyum nyoge. Detreapej piib ne rob giib toohd me tien gen tooro ke nyinga. Abea gihn raaj keraahyo e tiihye, beehda gihn kweere ke lor yaa akuud ge wen bang piny e ge puohny Ciig Beer. Yaa daahd ulor gene yaa caahdh ke wudh miehr ne puohny lum Juog, ge mahne mahno kedea ge rieme ke oogo bang yaa akuud keehd me nahg gene yaa ayiibo.

<sup>11</sup>Goma maa anhyaara, giib reje ge yug nyoge mooge ge keá ngoori. Nahge giib beeye ge ne ngoori. Nea dhaano gihn me beer ayuge, e gihn beer e yuge ni, e ne nyoadh ngo kejea ngaan nu beehda nyethiin Juog. Abea ngaa yug gihn me raaj, e gihn raaj e atiihye e ne nyoadh ngo kejea Juog kwihye.

### Ngooru Tihiy Demetruj

<sup>12</sup>Yaa akuud cang ge rob giib me beeye ke nying Demetruj kejea ngo ngaa me beer. Ge rob giib me beeye ke nyinge bang gihn ngo beehdo kaa dhe yoohn giib beeye ge anyoadh Juoge. A thiow, ngo aroba yihri kejea Demetruj beehda ngaa me beer. Ngahda ngo ngahyi kejea lum roba beehda gihn maa adiehr ni?

<sup>13</sup>Giib me thoohdh me daahda ke rob yihri nud. Abea a be daahd ugweeda gen yi warga wa kwaad gihn. <sup>14</sup>A gaahn beehn ne liew yih ka me cahng mee. Kaano arumo, e wo upiib ne rob. <sup>15</sup>Beehn Juoge cube laahw wihj yihri. Gomi ge beehda yaa akuud kan yih amaahdh gene. Maahdh goma, goma ge beehda yaa akuud gihr geenu ke cing apaar naa aciel acielo.